

陝西商州直隸州鄉土志

上冊

1793109
1530
11-2

歷史

本境建置沿革

商州後周宣政元年置即古商國在今州東八十里商洛鎮地見括地志堯封契地

也見史記在禹貢為梁州之域周為豫州境春秋屬晉為上洛邑

戰國屬秦孝公封魏鞅於此號商君始皇并天下屬內史方見

輿記漢置商縣元鼎四年復置上洛縣俱屬宏農郡後漢為

上洛侯國屬京兆尹三國屬魏見乾隆府廳州縣圖志晉泰始二年置上洛

郡後魏太延五年置荊州太和十一年改為洛州後周始改

曰商州隋開皇初廢大業三年復改為上洛郡唐武德元

年復曰商州天寶元年又曰上洛郡乾元初仍復為商州

初屬關內道後隸京畿五代屬水興軍路宋因之紹興九年屬

金州金初屬京兆府路貞祐四年改隸陝州興定二年復故元光二年

改屬河南路見乾隆府廳州縣圖志元省上洛縣入州屬奉元路明洪武七年降

州為縣屬華州成化十二年復升為州隸西安府

國朝因之雍正三年改升直隸州隸陝西布政司領縣四此歷代沿

革之大凡也



政績錄

晉武茂字季夏沛國竹邑人以德素稱為上洛太守清直

方正聞於朝野

晉書武茂傳

北魏李和朔方嚴祿人仕魏為夏州刺史有惠政遷洛州

仁恕為治獄訟衰息士民思之累遷上柱國謚肅

府志

後周庾信字子山河南新野人有文名孝閔時任多識舊

章拜洛州刺史為政簡靜吏民安之尋徵為司宗中大

夫

府志

唐崔日知靈昌人商州司馬以明經仕當燕王重福之變

官司悉逃日知獨率吏卒助屯營擊賊以功遷京兆尹

建言廐馬太多請分牧隴西省關畿甸調加光祿大夫

歷任清苦其母曰貧乏不能興此是好消息

府志

李西華貞元中為商州刺史西至藍田東至內鄉七百

餘里山阻重沓小遇暴雨則隔絕行旅或露居糧絕旬

日不止則往往僵卧西華置墻立廬又徧山通徧路以

避盛水自是行李不滯

冊府元電

李佐為商州刺史德宗貞元二年以能政特賜金紫

冊府元龜

韋倫德宗時任商州刺史平荆襄有功擢太常少卿

王凝并州晉陽人字成庶舉明經進士為商州刺史驛

道所出吏破產不能給而州有治賦羨銀常推直以優

吏奉凝不取則以市馬故無橫擾人皆慰悅

唐書王翊傳

五代王祚并州祁人從晉歷周為隨州刺史移刺商州以

俸錢募人開大秦山若梯路行旅感其惠顯德初置華

州節度以祚為刺史

宋史王溥傳

宋王禹偁字元之濟州人進士太宗時摘商州團練副使

種蔬自食終始一廉州之深山窮谷民皆刀耕火種其

俗更互力田約期至齊同振作援桴者有督課勸勉之

語若歌曲然公嘉其義而鄙其辭作畚田詩以侑其氣

蓋欲山民之易曉而汙萊盡闢焉

王宗元皇祐中任大理寺以直貶監商州酒稅終守清

節琴樽自娛有詩名

府志

邵隆紹興六年知商州理商號十年披荆榛招流散藩

隴北鄙商號為金兵所掩旋即恢復會和議成割商界
金常怏怏改知金州時以兵出敵境秦檜恨之徙叙州
陰醜之焉

元盧信至正中知商州事有惠政

東良惠鞏昌人至正末總管商州紅巾亂城陷死之

明陳榮祖洪武中知商縣時兵燹之餘縣治俱廢榮祖為

政有方吏民畏服勅建祠宇壇壝百廢俱興

西安府志

沈暉直隸宜興人成化中單騎之任一民不擾鋤革強

豪輯安良善

孫昌榆次人成化中知商州時初改州城官署壇壝皆

昌勅立蒞任最久惠愛及民一時良吏以昌稱首去任

之日民立碑頌德焉

原傑山西陽成人撫治商洛左副都御史成化間巨寇

王彪倡亂漢南流民依聚猖獗特遣傑親履其地招撫

流移傑安集之餘議建鄖陽撫院析縣東為商南南為

山陽陞商為州專設撫治道奉壘書監臨屬於鄖撫民

始安堵比去士民請留特加尚書

商州志

李應和四川大竹人宏治中任鋤強勸善吏畏民安修廢墜興學校

伍箕安福人宏治中進士知華州清恕愛民幾於刑措及審戶役民感其寬更委編審商洛官至苑馬寺卿李騰芳宏治中任持己端嚴勤於課士

鄧琦正德中任斷獄詳明捕盜多獲時稱為能吏

陳鼎山東登州人正德中任身親矢石多擒賊禦侮之

功志樂清貧有愛民省費之政民立去思碑

蕭廷傑字元功瀘州人嘉靖間進士知商州約已裕民

初任即申革大支小支廩給以甦里甲兩院通行各道

裁革興學造士以和介稱

商州志

李延康山西長治人嘉靖中任明恕愛人政持大體課青衿殄礦盜

姚九功山西襄垣人嘉靖中任潔清正直獄訟詳明期年陞本省副使

楊儒魯進士嘉靖年任州事儒雅有文名陞僉事民立
去思碑

陳潞隆慶中任興學校行鄉約勸民簡訟務農種樹陞
南京戶部員外

李石嶺湖廣澧州舉人萬曆二年任長厚存心嚴明涖
政四知白壁堅操百姓青天播頌此士民呈祀語也

王以孚達州人知商州于民禮士政令寬平捐俸以易
學租後以其資築龍山塔移雲路浚泮池宮墻一新商州志

龔錞澧州人舉人萬曆中知商州愛民禮士改收頭支
使議紙戶召募裁舖司兵銀蠲免逃亡尤甦民困賈志

蘇濬字君禹福建晉寧人萬曆進士十七年任問民疾
苦釐蠹清冤議行條鞭節省萬計創建書院譚經較藝
指示法程連科獲雋者鵲起時礦寇趙天知等千餘嘯
聚濬潛抵巢穴擒渠魁士民歌頌祠書院

吳顯字景猷福建漳浦人萬曆進士十九年任安靜寬
簡肅吏治繩奸宄議就條鞭所減省三千餘兩商人歌頌

周文煒江南人崇禎癸未署商篆多惠政時奉上檄派徵民運銀二千八百兩煒憐商疊罹兵火極力申銷之州人尸祝及十月李自成破商州被執不屈厲聲大罵賊割其舌煒怒目喫血喉中猶作罵賊狀賊以鉄鋤燬赤納其口磔其屍一子亦被執見父屍痛哭憤詈賊亦殺之

黃世清字澄海山東滕縣進士崇禎十二年任端方嚴介李自成寇商與士民堅守凡三日夜城陷被執賊欲官之世清髮豎眦裂勵聲大罵賊怒殺之商人塋於金鳳山士民呈請入祠

國朝薛所習孟津人順治五年以選貢任州事兵燹後悍僕多凌其主所習隨事痛懲之名分始肅明季加派三餉每丁每年徵銀二錢二分有奇迨後民丁傷亡過多生代死賠窮黎莫支然皆因循未遑議改也所習力請蠲免民受無窮之惠又建州學拓城隍廟隙地增修殿宇商民建祠祀之

許宸字菊溪河南人順治八年任商州簽事削平流寇
編農民為伍地方由是肅清改大雲寺為啟秀閣撤浮
圖淫祠祀文昌蓋以亂離之後急興文教俾商民去蠶
凌而即禮讓尚絃誦而敦詩書有碑有志州人士思之
至今不忘

劉正任邱人順治九年任州事州自明季為盜藪正一
意招徠與民休息倡修龍駒寨通商惠工設戍防守由
是農桑大興盜賊屏迹又創設五經學社於北察院講

學課文科名鵲起

王思治遼東人順治十三年任州事前明州境分東西
里挨甲簽報富民收解賦役銀兩受累傾家者無數思
治莅任結建草房於大門內左側分東西里吏書輪收
官役起解百姓便之至今永免民解州治故有試院明
末兵燹後就試華州多士苦之思治建堂室號舍規模
大備

錢受祺字介之錢塘人順治十八年由進士任商洛道

州地田賦順治初每石徵銀二兩六錢五公有奇自薛所習申除三餉後受祺與王思治加意撫字極盡培養招徠之道

王廷伊山西介休人康熙元年知州事有政聲申除丁糧積弊與王思治錢受祺先後齊名商民思之著有忠烈傳

楊佐國荊門州人進士康熙十四年擢知州事甫莅任逆寇圍城城中震恐佐國率士民死守賊投以偽劄佐國登陣罵賊焚劄衆心益奮越七日大兵至圍始解奸民張名貴陰通賊遇民多脅從佐國力請於制軍置名貴於法餘得釋民尸祝之

戴良佐正紅旗人康熙二十七年任州事捐廉於泉村鎮棣花鋪資峪鋪老君峪各處置田若干畝以其租銀給義學生徒膏大家絃戶誦文教以興

王如玖字堅吾宛平人故禮部尚書王崇簡之孫也雍正四年任州事州治編戶十六里每里向設催頭一人

總清一里之錢糧行之既久奸弊日滋以致貧富不安
公私兩累如玖下車即行革除俾各甲各戶自行完納
百姓稱便購僦居之宅作官廨以州署舊基易民地拓
建大門儀門及六房書吏屋舍二十餘間署內規模略
備建學舍修

文廟築宮媿鑿泮池而

啟聖先農鄉賢名宦忠義節烈諸祠廟皆其捐廉倡建復搜求
文獻創修郡志十四卷牧商十七載興學造士敦本勸

農後人謂明達治體不愧官族云

許維權浙江海寧人乾隆十二年知州事教民引水灌
田民多獲其利故志稱焉

羅文思字勉夫四川合江解元乾隆十八年知州事循
績甚多其最著者如建書院以培士風續郡志以存治
體增社倉以恤民急並開渠三百餘道以灌民田復鑿
山路數十里今猶呼為羅公礪每逢歲旱禱雨於靜泉
山無不立應而於忠孝節烈則極力表揚故撫軍桂林

陳文恭贈以聯云一塵不染百廢俱興蓋非溢譽也後
擢貴州石阡府知府去民立祠尸祝之至今未替嘉慶
二十一年從祀名宦祠

任文溥江蘇上高縣拔貢乾隆四十三年知州事極力
整頓學校恭書

仁皇帝御製訓飭士子文刊於明倫堂屏門以端士習其書法
適勁至今宛然又捐俸倡修后土祠聿重祀典以為民
祈報地

鄧夢琴字虞揮江西浮梁縣進士乾隆五十三年任州
事清潔自矢愛民勤政折獄悉心無枉無縱書院向無
膏火捐廉設立每禱雨於石龍洞甘霖立沛裁革陋規
嚴禁賭博驅逐流丐清查保甲各店設以循環號簿緝
獲華州藍田逸盜窮鄉僻壤均各安居樂業奉委監放
渭南臨潼咸陽涇陽三原高陵諸縣賑糧窮民均沾實
惠學有本原政成愷悌嘗從漳浦蔡文恭遊閩中窺道
學源流終身守師說常曰當官難於慎守官難於正求

其難焉可也後陞任漢中府知府嘉慶二十三年入祀

名宦祠

詳見國朝
先正事畧

陳祁字紅圃浙江嘉善縣監生嘉慶三年任州事有膽
識白蓮教倡亂集鄉團削平叛匪戰功居多民歌再造
立感戴碑著有商於吟詩集亂後於啟秀閣創建魁星
樓培植文風

蓋方泌字碧軒山東蒲台縣拔貢嘉慶三年署州同事
有膽有識佐治循良時川楚教匪由武關入商州州同
分駐龍駒寨迭遭蹂躪方泌至地如洗賊酋張漢潮復
擁衆至方泌使置藥於麩中誘賊劫食之多死官兵乘
之遂西走漢潮揚言曰必報若公集衆謀曰賊雖去必
復東若等去亦死守不得耕稼亦坐餓死我文官也無
兵若能為吾兵當全活爾命衆議三日復曰生死惟命
乃築堡聚糧按見戶三丁抽一得三千人教之戰四年
賊果東犯疊敗之於鐵峪舖分水嶺殲賊數百鄉兵名
由是大振武關竹林關一帶鄉兵請隸之五年知州因

於賊方泌馳百九十里救援賊驚曰龍駒寨鄉兵至矣
遂遁去是時賊屯商州西及雒南山陽各萬餘人欲東
走河南方泌勒鄉兵二萬人列三大營以待賊不敢前
遂相戒無入商州境八年賊平計方泌分牧六載賊出
入陝必久無所得銳欲窺河南狼奔豕突方泌耿然以
一文吏不憑一城不藉一饟起千百農家子於逃亡饑
羸之餘抗堅悍滑習之賊於必爭之衝摧鋒守堅卒以
蕩平厥功偉矣尤精吏事重民命州人戴德立祠祀之

後遷甯陝同知

仁宗睿皇帝召見問商州事甚悉授順慶府知府改台灣府知

府兩攝台灣道篆旋以病歸

詳見國朝
先正事畧

虞友光江蘇金壇進士嘉慶七年署州事捐置學宮街
房一所賃錢集至三年散給士子鄉試卷費州人號為
虞公房重學校嚴保甲各里定立規條宣講

聖諭蓋亟亟焉有移風易俗之致

恒亮字輔之滿洲舉人道光年間三任州事多德政重

士愛民籌集制錢二千八百緡發典生息每屆鄉會試
用作賓興公車之費城鄉創立義學十一處以訓寒微
子弟又籌制錢二千二百緡生息作為塾師修脯商山
書院東西偏增修街房四間租錢作為書院歲修經費
考院頃圯學使按臨號舍多遮以蘆席復捐廉集五屬
士子重補葺之並捐廉重修

文廟暨啟聖祠尊經閣修補城垣百六十餘丈商人感戴至今
不忘於每歲二月初四日設筵祭之蓋是日為亮誕辰也

王履亨字筱圃山東諸城縣舉人道光年間三任州事
政平訟理民不知擾捐俸錢九百餘緡修葺城垣四周
完固

張錢道光二十五年知州事嚴約胥吏催科不擾適奉
整頓錢糧劄遂示諭鄉民地丁一兩外准加耗二錢每
錢如之一錢五分以上俱以錢納加耗如前立戶過糧
革盡規費量給紙筆錢一百文出納倉糧均用平概不
准淋尖踢斗等弊每斗量加一升以作鼠耗霉溼惠被

齊民闔郡紳民於城隍廟鼓樓旁立感戴碑捐俸興修
龍駒寨西關外路七十餘丈至今蕩平行人便之

唐李杜字詩輔湖南祁陽縣進士咸豐元年任州事性
剛直才識宏通尤工書法下車伊始注意人文觀風時
擢取舉人潘蓉亭貢生王石樵類多知名士著有引伸
文集讀我書齋詩集當時東南軍務旁午往來兵差絡
繹不絕當路擬將支差兵費倣外縣里民局法攤派里
下李杜屢上書力陳民艱以身任之得以豁免闔州士
民奉入報功祠至今感戴不忘

趙光播山西崞縣進士咸豐五年知州事明敏果斷長
於聽訟民無冤抑案情雖極疑難一經訊鞠摘發無遺
兩造畏服州人呼為趙一堂

曹熙字緝堂甘肅皋蘭廩生成豐年間四任州事存心
慈愛胆略過人同治壬戌春髮逆由豫入境邊報猝聞
風鶴頓驚越數日陡逼城下危如累卵熙倡以大義督
率僚紳軍民登陴守禦時開鎗礮轟擊賊鋒少挫焚掠

附城鄉村而去自是髮捻各匪更番叠擾川匪亦竄及商境州城尤屢戒嚴熙就大局籌之以為南山賊匪非多忠勇軍不能平爰傳諭本州紳士邵欽誥聯會華州紳耆詹應德等百三十餘人具稟給以川資並犒軍諸物冒死前往請援蒙派藍鎮軍率所部四營防勦賊由是遂不敢犯商州全境以安統計三年兵差都費七萬餘金熙慘淡經營從不擾累地方鄉民如戴二天至今孺婦猶知其名

李煒字惺夫湖北興國州進士咸豐十年知州事素精農學存心愛民南城外地瀕丹江多衝廢煒築修堤堰百餘丈得收水田之利商民至今稱之

楊吉雲湖北鄖西縣貢生同治元年五月代理州事值髮逆蹂躪後地方凋敝供支兵差煞費心力七月蝗由豫晉飛入遮蔽天日嚙傷禾苗西南北三鄉尤甚徧處告災吉雲躬率差役督同各里鄉保撥派民夫及時捕治撲滅無遺不為大害鄉民感之